

四庫全書

集部

欽定四庫全書

松隱集卷六

宋 曹勛 撰

古樂府

古戰場

烟冥露重霜風號聲悲色慘侵征袍據鞍顧盼度沙磧
縱橫白骨餘殘燒舉鞭遲留問田父彼將欲語先折腰
泣云畔寇昔據此老夫父子服弓刀將軍下令起丘甲
法嚴勢迫無所逃攻城奪險數十戰民殘兵弊夷梟巢

當時二子沒於陣老夫幸免甘無聊匹夫僭亂起阡陌
禍延千里俱替替官私所殺盡民吏坐令骨肉相爭鏖
唯餘將軍封萬戶士卒戰死埋蓬蒿至今野火遍昏黑
天陰鬼哭聲嘈嘈

戰城南

鐵騎方侵掠臨淮厲虎兵三麾俱至地一戰破思明令
下秋霜肅威行草木驚豈但全孤壘能令復舊京吾君
方用武宵旰念儀刑

箕山操

并序

琴集有名無辭今補而廣之庶乎後之覽者可以彷彿
前人之心云

草可以為衣兮木可以為廬水清石白兮渴飲有時而
饑食有餘止不知其吾之有影兮而行不知其吾之有
軀彼日月之自明兮吾又安知其所如君乎君乎且將
免我以天下而無適不幾於贅乎

小游仙

九霄風靜夜沉沉仙籟虛徐度玉音好是太真歌未闕
飛烟遙上鬱華林

十二層城倚閭風金臺珠樹鬱葱葱遙瞻玉室藏書府
萬仞飛光散曉紅

搖曳空歌上玉清飛烟冉冉拂仙纓龍輶已過黃金闕
致肅門郎識姓名

春光好

十年不見春光好龍沙馬齧長安草長安草盡人已空

宮館園林迹如掃東都西洛暗兵塵
畫引狐狸上黃道長淮水淺吳山低
戍邊時巡無已時無已時萋萋草綠
邊馬肥濠城短小不蔽眼況復瑣屑
游芳非何當仗劍從神武晴春甲馬
爭光輝

送春歸

送春歸在何處未忝正離離江城匝
屯戍楊花零亂點旌旗天涯芳草連
雲暮舊園桃李遍荆棘故國樓臺竄
鼯鼠衣冠不見洛陽花鐵騎猶嘶渚
宮樹吳江水綠吳

山青春到春歸別有情柳色迎人下關塞隨軍萬里清
烟塵黃金臺榭未埋沒當年勿謂秦無人

秋夜長

秋夜長秋夜長風高月落飛清霜征鴻蕭蕭度湘水草
木露冷蒹葭黃鐵衣老將尚橫槊健兒甲馬爭騰驤閨
中思婦臚銀燭耿耿念遠傷肺腸壯士悲歌扣商角通
夕無寐空淒涼況是愁人怨遙夜安得日出升扶桑

怨遙夜

六龍滅景兮疾如馳結隣曠暝兮沉海涯飛霜烈烈以
襲物兮其容慘慄陰風凜凜而薄人兮其聲淒悲祥鸞
伏竄兮鵙梟號呼哲人永歎以哀吟兮貪夫適其覬覦
彼庭燎之不吾遭兮良卷懷而鬱紆勞歌三發兮晨雞
未旦使我耿耿以戚憂兮獨展轉而向隅

歲將暮

并序
自金中歸時

歲律將暮我行獨勞家無餘儲晨昏不贍性多愚鄙拙
於治生拊已興懷歌以自傷云

歲將暮歲將暮靡靡行人不歸去不歸去道路長道路
長兮復限我以石坂羊腸山多喬木兮不能為吾之棟
梁水多深阻兮不能為吾之舟航徒頓駕以獨宿兮趨
風雨於晨裝眇佳人兮懷余期遙集于扶桑

隋堤草

綿綿隋堤草草色翠如茵梧桐間桃李穠艷驕陽春楊
柳垂金堤拂舞無纖塵行人不敢折守吏嚴呵嗔大業
一崩隕九廟猶荆榛隋堤草與木採斫雜樵薪秋風號

枯枝野火燒陳根園林宮館尚禾黍草木於爾何足論

蔓草長

并序

余所寓之室前有喬木一本葛蔓延累其上感物興懷
有蔓草長以風焉

蔓草長搖風緣砌凌高堂萋萋密葉護蔥蒨溥溥湛露
滋瀼瀼下有徑寸蘭委靡塗秋霜依憑既失所不及菰
與蔣託身肯媚附喬木持芳自潔疑幽香蔓草長因緣
從爾摩蒼蒼一朝喬木大斤斧掘根削株貽汝殃

隋堤柳

隋隄柳千里夾隋隄隄中有平道百尺隱金鉗柳色間
桃李行客迷芳菲牙牆從西來雲表開龍旗一舟挽千
人萬舟若魚麗舟中盡絕色不厭荒淫譏錦帆壓奔流
日夜東南馳龍舟未及返身辱吳公泥神器失所託化
作迷樓灰向來桃與李花色猶不衰向來堤上柳柳色
猶依依唐公已舉晉陽甲草木雖小知無隋

折楊柳

并序

折楊柳即樂府鼓吹曲漢魏以來唯給邊將

折楊柳上隋堤攀條同憶送君時君王近發關中卒更
戍歸來尚未遲

折楊柳上章臺柳色依依尚未回漢家盡得單于壘屈
指歸同社燕來

折楊柳灞橋西去日同君上柳堤聞道將軍得天馬歸
時芳草正萋萋

去日霏霏雪滿衣思君楊柳正依依新來又得征人信

君去交河尚未歸

去日同君過渭橋
橋邊新雪未全消
如今窓外楊花滿
憔悴無心約細腰

悲採薇

昔辭萬乘寵
潔已歸其仁
強諫非矯訐
所守懷真淳
邈矣思唐虞
去去迹已陳
夏禹且不讓
叔世良悲辛
採薇歌西山
獨往誰與隣
激節不少渝
終始無緇磷
優入聖人域
清風高隱淪
嗟嗟首陽山
今飛戰馬塵
况乃匪湯

武吾子勞諄諄已而復已而緬默思良辰

感秋蘭

雲何為兮深山水何為兮幽谷匪雜珮于華裾恥見珍
于流俗噫嘻疑枳棘與荆榛不辭榮於秋綠

梅花落

殖雖無遠近開獨占三冬怨入哀笳切香凝素臉穠有
子調金鼎遺根益縣封佳人初睡起留取照芳容

哀孤鴻

江上書事

哀孤鴻孤鴻杳何所
堅冰合洞庭積雪滿南楚
弔影破寒空淒涼宿烟雨
上林衰草暗池塘衡岳居人雜豺虎
縣官下詔收箭工
繒繳高張求勁羽
稻粱粒粒盡輸軍
飲啄號呼困秋浦
至今燕代滿干戈
每欲歸飛畏弓弩
畏弓弩誰能為我驅
先路驅先路歸故土
一身雖困忘辛苦

天上月

皎皎天上月隨人如有情
何當背銀燭棄我如絕纓

關山月

關山月關山月分影送征人
寒光射矛戟悲笳聲斷塞
鴻驚征人淚下思鄉國

高樓月

高樓月倒景入闌干
人眠綺牕影月在青雲端
相攀不可得空成簾幕寒

估客樂

朝飲文君酒莫宿邯鄲妓
近得浮梁書春前辦行計

班婕妤

寵移非為妬花落不因風來往長門月羞將團扇同

王昭君

好惡由來各在人況憑圖像覓天真君王視聽能無墜
延壽何知敢妄陳

游仙

四

天河水冷烟波渺流水無聲銀浪小白榆歷歷映瑤沙
白露淒清下雲表扶疎丹桂落紅英片片紅霞散瑤草

月中桂子空傳名散在人間無處討仙翁呼童收紫芝
紫芝肥嫩光離離遺英殘萼墜無數仙鶴飲啄時鳴飛
仙人種玉耕雲隈倚雲橫笛學鳳吹須臾羲御崦嵫沒
相呼拍手騎龍歸

飛轡絡絕景訪我同心人解駕三秀額濯足玉華津晤
言會良契携手凌高晨揚旌出閭闔羽節趣羣真入宴
明霞館回輶過始青音靈散空洞逸響縈雲營倏忽九
萬里流目低蓬瀛玉妃欸清話偃蓋希林庭顧彼簪纓

客寵辱勞汝形神仙有真訣胡不希長齡

嚴駕發滄浪行樂從所之方諸欸青童隱景朝鬱儀流
金戒前道玉節紛姜蕤運策乘飛電揚旌耀彩霓斑龍
承倒景蠖略翔紫微命我發金策受事臨西垂白帝啓
真籙斟酌合四時解帶清商館置酒璇淵池高酣發空
謠羣響淒以悲海水變蒼陸翻覆如奕碁咄叱紅塵子
役役何所為

駕景絡絕響游目低陰虹靈光轉修袂羽節飄晨風抗

手辭金母偃蓋東華宮
高山發空謠逸響飛九重
霞觴艷流目疊舞歌玉童
緣雲上虛籟笑語鏗洪鐘
海水屢清淺倏忽欣再逢
不惜暫游詣情款無初終
歡餘促歸軫攝轡翔斑龍
投閑憇三素保績崇真功

劉生

并序

劉生不知何代人自齊梁以來有劉生詞盛稱豪俠周
游三秦五陵又云抱劍專征為符節官云

劉生世關輔游俠周五陵倜儻天下俊持夸矜劉生落

魄游其間豪族相依承闔難橫大道走馬入重城醉卧
金張館高談衛霍營報仇先劇孟排難鄙侯嬴逸氣凌
秋鶚清才瑩玉繩燈前看寶劍雪裏按蒼鷹校獵黃山
苑追兵青海濱華夷知姓字燕趙冠婚姻恥作諸侯客
寧為奔走臣匈奴方入覲雄略未能申且醉當壚酒將
軍詎敢嗔

細君

并序

漢武帝元封中以江都王女細君為公主嫁與烏孫昆

彌至國而自治宮室歲時一再會言語不通公主悲愁
自為哀怨之歌其後元帝亦以王穰女昭君嫁匈奴單
于昭君至彼作歌自傷後人多為歌詩流為樂府遂有
明妃怨昭君怨獨細君最遠而悲思尤甚又世人無有
哀感之作余亦迹而新之抑亦摠昔人之幽憤為來者
之深戒云

族類皆有偶所偶各有方我本漢家女遠嫁烏孫王言
語既不通嗜欲寧相當生肉以為食羶酪以為漿毛卉

襲衣服蒜薤為馨香嗚嗚當歌舞跳躍紛低昂風沙障
白日四野皆蒼黃逐獵射禽獸藉草糴為牆喜怒不可
測貪戾詎易量自為治宮室僅能庇風霜歲時一相見
但見眉目光東南望漢日獨覺霜天長飛鳥戀故林游
子思故鄉而我被遐棄失身投窮荒明明漢天子一女
奚足傷武威與文德豈不在周行吾王居下國奉上固
所當結親徒自辱掩泣羞漢皇

懷遠

有美人兮隔千里彼不來兮我獨止吳江木落又經年
壯士悲聲寒易水

秋色

空空翔水裔海月飛冰輪大旆連天山羽校羅秋旻霜
輝明縞練綵錯光鱗鱗一掃龍庭空海宇無纖塵

秋思

日落碧山暮陰風生白蘋飛響散高梧水石光粼粼海
草未凋綠朔馬嘶咸秦蕭颯兩華鬢十年吹戰塵

黃鶴

并序

古樂府有其名而亡其詞

子晉升真後茅君謁帝初靈風翔羽葆舒轡聳雲裾凌
虛前虎節方駕後龍輿平旦辭龜嶺禺中過鳳虛故里
頻遷改山川遽有無當時武昌水清淺轉城隅

黃雀

羣聚羣飛畏行止飲啄驚鳴顧無已多虞多事足機張
獨宿蓬蒿信為美

楊花

春光誰占得楊花獨自知
未到傳消息將歸送別離
隨風飛更急入戶舞還低
大有撩人處粧臺惱畫眉

當壚

吳姬年十五艷色嬌
陽春花間開繡戶
席上設紅茵含羞留醉客
歛袂送行人
多謝金吾子衷情詎易陳

有雪

時冬無冰
春大雪

有雪有雪何不時
號令無乃乖其宜
元冥失職變常燠

草木不黃流不漸羣蟄開張動平陸廣野宮闕騰蛟螭
方今春王布仁政育養萬物如嬰兒爾何干職助陰沴
致使造物無威儀四序平分佐天吏物色消長隨指揮
元綱既絕亂箕斗五行顛倒盈縮虧安得調元按天步
太微受事三光齊璇璣不愆四七正時歌玉燭滋黔黎
爾之不職有常律司晨執僇歸攝提願得唐虞二八一
十六相佐天子雷風時至無錯迷

皚如山上雪

皚如山上雪凜冽生陰寒狐狸卧深穴猛虎饑不眠下
有千尺松埋沒多摧殘山椒冠叢祠寂寞無孤烟傍有
古戰場鬼哭聲煩冤燈火斷城郭雞犬雜喧喧朝官急
征夫迫促爭後先柴門不得閉行者不得還何當霽風
雪巖岫開南山

松隱集卷六

欽定四庫全書

松隱集卷七

宋 曹勛 撰

古詩

僕持節朔庭自燕山向北部落以三分為率
南人居其二聞南使過駢肩引頸氣哽不得
語但泣數行下或以慨歎僕每為揮涕憚見
也因作出入塞紀其事用示有志節憫國難
者云

入塞

妾在靖康初烽火滿京師城陷撞軍入掠去隨廬兒忽
聞南使過羞頂殺羊皮立向最高處圖見漢官儀數
上聲

日望回騎荐致臨風悲

出塞

聞道南使歸路從城中去豈如車上餅猶掛歸去路引
首恐過盡馬疾忽無處吞聲送百感南望淚如雨

早行相州道中

安陽道上晨冲融西有雲氣成青紅四重欄干五滴水
五花競鬪相穹崇旁有臺殿峙鳩尾上有翔翥如飛龍
擎拳歎仰得未有頗似西母居其中微臣一念到彼處
仙班趨揖殊從容跪奏內人遇至道沆瀣一飲和氣充
脩然退歸復故幹神宇欲便摩青空卻看向來禮謁處
但見碧落相冥濛

過楚有作

十年三過景物輒異慨
嘆成詩呈內相楊尚書

昔見山陽盛氣象吞淮壩士子世忠孝民物安園田再

到已屯兵輦鼓喧中天戶口莽凋弊廬里儲橐韃濟師
有虎臣隔岸旌旗翻翠華江海上王闕風塵邊未至重
慨歎荒城委蒼烟貔貅過江南孤兔游城顛餘民如驚
鹿菜色慘不鮮呼之莫肯留猶意敵所專三過乃三變
感時良泣然二趙忠益高仲車魂尚賢欲弔寂無所淮
月空涓涓

過邯鄲

恭持天子節再經邯鄲城斷垣四頽缺草樹皆欹傾慨

念全趙時英雄疲戰爭殆及五季末瓜分無定盟慨念
蘭君高壁亦安所盛翩翩魏公子有德勝所稱殆今已
千年廢臺漫崢嶸趙民尚自若歌舞娛春榮金石絲簧
奏彷彿餘新聲興廢乃爾爾人事徒營營望城只歎息
盡付西山青

望太行

落月如老婦蒼蒼無顏色稍覺林影疎已見東方白一
生困塵土半世走阡陌臨老復茲游喜見太行碧

持節回呈王樞

去時炎歊極蒸鬱塵滿籃輿困搖兀歸時大嶺雪已飛
易水清漳醒病骨三月不親君子儒一笑且脫蕭何律
身輕頃刻渡長淮眼前喜覆杯中物

賦洪景伯分繡閣

赤城今屏翰瀕濕浙右同不有仙人居梅渚難從容洪
仙下瀛州一笑除蒿蓬創閣俯江海重簷煥雲空排衙
碧嶙峋烟霞透玲瓏遙岑與絕壁但覺開青紅愛之榜

佳名坐見羣山工萬疊烘曉日六幕泛景風時時與賓
僚醉酌黃金鍾請凭十二欄更賦烟雨雨中

及甫坐上分題賦洗竹得百字

剝竹有舊貫剪伐未容測長身數竿足叢薄徒累百稍
令掩翳去漸放脩直色要知清明朝惡者在所格

有惠錦鷄者因暇賦之

山雞美毛羽五采若絺繡不能掩顏色居然遭籠囿嗟
賞入欄檻玩好資稚幼有稻莫能飽有水漫濡味低昂

不自得雲山計未就應歎鴟鵂類腐鼠邀白晝

分題墨梅得客字

北風吹雲村寂寂練練溪流湛寒碧馬頭忽有暗香來
撼雪尋芳識標格揚鞭敲鐙荒寒路酒惡難禁賴銷
釋隴上故人消息遲一枝誰寄疎煙隔老禪幻此空
花相墨暈橫斜清照客定應飛夢會羣仙玉樓澹月連
天白

題澈浦金粟寺二

我聞金粟名來謁示病相不見隱几老松竹空函丈雨
花誰聲聞擊鉢定非想歸去一笑粲春風快雙槳

入門不見佛已悟本無相若為是真求沙界等尋丈欣

逢兩禪老

尚初
法舟

妙悟滅心想行當求所求筏喻不言槳

題黃灣真如山般若堂

真如山中龍象宅前三後三率禪客珍公提唱悟本心
一指不留庭下柏我來春事梅已玉仍吸靈泉酌寒碧
會看海印發光時臺前壁月連天白

題唯庵後大松

唯庵有長松秀拔撐青空銅石並根榦榆枋比蒿蓬天地蔭中邊日月奔西東願言滋浩養千歲看此公

題友人書後

客子得秋涼壯懷亦增慨永念故人遠三湘渺滄海

題王氏女自寫渡水羅漢

尊者颯離方廣間神通遊戲山水閑女郎夙植窺其藩妙筆寫出尊者顏甚知此意大廓落直與世塵解纏縛

不須錫飛與盃渡政恐有僧敲折腳

贈吳思道

某也極連蹇世緣牽喧卑久困戎燼間方與鞍馬辭得
奉宮觀祿遽失糟糠妻淚零惟惠風春慘中惻悲生理
正落莫幽思難平治公來煦歛遙率孤再拜之慰藉累
年別歎息私門私而公顏渥丹綠鬢白髮稀頓換神氣
妙密驗刀圭奇內典禪悅深外丹日月遲陰功粹雅度
方為世所師永懷我先君與公深相知辱以執友契肯

顧賤子微賤子感誨言於茲老鋤犁甌窶祝場圃翕張
防寒饑時時射遠郊一一得自怡次第教三子令諳田
畝為老鈍依賴簷忘言隨四時幸會道此樂秋風遽言
歸尚有一辦香願奉鍾呂期

贈陳季野

平生聞說陳季野渠正奇奇余下下人間韻語光陸離
韞櫝藏之當待價顧我飄然離帝傍適是適非思陶寫
庶幾一笑排春溫賴有梅花尚盈把

選上人素履精修僕先識於崇信岑寂之時重
來見之作詩為贈

我初游赤城松竹空函丈師時奉諸佛畧不乏供養茲
游再見之談笑益夷曠橫披慰老眼覓粟煎夜餉不以
三生緣遂作一指想新蕉展時雨風鸞鳴晝講勉旃自
愛重公才定龍象

寄蘇徵君

平生聞說蘇養直鞅掌塵勞慚未識清江韻語百代尊

擬望孤撐徒著屐未將經綸佐廊廟且落珠璣滿泉石
頗知新築更靚深願並廬山歌馬跡

先生在馬跡山居

寄張達道先生

永懷凝神公履正羣僊誇流目厭塵土軒冕悲泥沙羽
蓋承倒景颺輪泛晨霞前旌絡霄隊駐節王母家真童
發清謠雲表翔哀笳樓居映朝日服采明珠華萬春等
朝菌歡事詎可涯瑶席未終醺零落蟠桃花想同董奉
君更尋上漢槎

寄鄭漁仲

君家谷口藹清節後裔於今耿冰雪高明固已天下聞
却向山中弄明月貫穿諸史極成敗鼓吹六經方論說
碧雲日暮臨庭柯緘封肯寄衝烟蘿邊頭磬磬一雁過
坐想空山霜露多

寄空上人

華頂峰頭空侍者家在全閩九峰下后山妙香今始聞
西江一口元非假可但枯木已陽豔更喜淮碑仍續雅

天風海雨會入詩
况近梅花欲盈把

雨中寄李正字

我能甘貧誰委悉
惟欠鼓頷曳杖乞
閉門寧餓十日雨
約已何能六尺屈
裹子桑飯公等恩
食駿馬肉我固失
行將雲水縱所如
一琰清泉負朝日

新歲七十以人生
七十古來稀為韻
寄錢大叅
從心之歲自由身
恩許前期脫搢紳
一褐林泉侶樵牧
熙熙端是太平人

蕭然心跡喜雙清且得肩頭擔已輕老病正須安靜處
林間風味慰平生

一二三四五六七行年臨之如電疾只將香火對清閒
古井無波應委悉

未就歸心如束濕久客京塵常汲汲碧雲向晚愛歸飛
空看五五與十十

小築幽深無伴侶默坐忘言時獨許百年心事付閑雲
一卷仙經還太古

一鄧兒輩自鋤開繞屋梢梢併種梅摘葉尋枝看未足
橫斜已覺報春來

居當山麓入烟扉喬木蒼藤接翠微築室暮年今尚少
得歸真是眼中稀

錢大叅有和用韻謝之

瑞峯來現宰官身清峙巖巖聳掇紳聞道石頭時說偈
一堂驚動水雲人

冰玉無塵徹骨清世間榮祿一毫輕未論此際通三際

直向今生度此生

天一地二數至七開天之天識量疾蕩然獨立放全身
莫問諸方悉不悉

露地全牛何濕濕豈比漢陰負井汲拈出老胡向上機
便知挂一不成十

相君自是仙山侶大筆如椽鄙燕許七篇方愧不成章
肆筆相酬語罕古

忠孝傳家大府開蒼生久已待鹽梅我雖潦倒山林下

會聽中天紫詔來

曾奉清言吐屑霏巖廊又復仰幾微正須國論籌前箸
毋使人間見亦稀

瑞巖仰老見和復酬前韻

請得忙中物外身要看飛瀑瀉天紳佳時每與漁樵伴
笑語相陪是故人

雙澗流泉徹底清五峯晴挂白雲輕泉流雲散遲歸步
猶欲思豐問此生

生死之徒六與七可救羣生可愈疾心如秋月碧潭空
深閉巖扉方表悉

台山之麓少卑濕小築還占甘井汲陋巷閉門飲一瓢
慚非回也能知十

當年卜近虎溪侶領畧閑心笑相許豈圖雲水各一方
回首向來若懷古

白足持詩懷抱開清言秀潤喜惟梅便知雅貺脩脩意
端為閑人特特來

雲英兩鳳跨烟扉收盡詩才坐翠微相國題評為携挈
一方蓮社似公稀

松隱集卷七

欽定四庫全書

松隱集卷八

宋 曹勛 撰

古詩

送凝神張先生還茅山

我家天台玉霄峰旁臨雲海空復空
水光際天接山影山間樓閣相溟濛
仙人騎鯨度空碧步虛聲下飄天風
纓冠葳蕤跨綵翼子晉鳳笙驚盲聾
半夜電雷動巖壑一壇松檜知仙公
別來放跡入朝市但覺塵土填心胸

猿驚鶴怨愧昏旦竹露蘿月徒惹龍君庵三茅何冲融
暮春旅寓凡聖同同造勝境瞻真蹤弟兄乘雲御飛龍
為時作瑞留從容但見仙驥頂有紅凝神坐嘯隱萬松
粲粲玉齒猶顏童珮聲促詔朝帝宮清淨為正裨聖聰
坐乎少廣追崆峒物不疵癘毒域中翩然鶴歸茅岫東
一篙秋靜磨青銅他年我亦披蒙茸草屨瘦滕饑不充
應許下竈為陪從

送曹蘊清歸廬山

吾宗出西蜀託跡廬阜岑恭禮清虛
相與道義深別時白日長忽茲秋雲陰
永懷一笑粲水雲勞我心

送子威兄鈐兵池陽

伊昔侍伯父一官尉池陽時年方九齡
讀書未知方於今涉五紀皤然鬚鬢霜
茲喜伯兄官鈐兵總戎行素風出韜畧
貌貅稟宏綱小試部勒勤著鞭揚榮光
青林脫幽籜濃綠棲殘芳起予水雲心
尚拘朝市忙齊山上穹碧九華儼珪璋
紫巖誰敲冰雲葉供展張清江霽遠目

帆檣下滄浪林泉作佳游為公發天藏伯父昔所臨
雲漢披天章琳琅戛鳴球往往題僧坊何當切訪問便
與磨珉蒼庶於門戶間能事歲月長仙舟涉初夏浮
雲及清涼毫舉塵土境海運圖南翔兄弟各垂白語離
熱中腸願言養浩然時舉黃金觴因風託素鱗訪我菰
蒲鄉

送許尉

顏

平生許彥充軀膽兩豪舉掀髯叅軍事詎可細碎語我

時百僚下計拙役甚苦從事得餘力慷慨志相許公乃
小著鞭一官尉南浦鹽車雖云困垂棒亦其所願子自
薦達天王方振旅求田勿墮氣苞茅當問楚此事豈不
壯况復吾素與我緣擁縗服窘欲訪雞黍天寒霜雪盛
世亂豺狼阻何堪南北趨別意寓殘俎傷心有清淚揮
灑欲如雨

送戴才美郎中出使襄漢

仕宦將相理所當致君澤民則為良竊竊苟作兒女語

紛紛徒在鵷鷺行惟君英傑吞七澤早以閔畧吞黔羌
天子神聖熟姓字臨遣亟自尚書郎密奉疇咨持玉
節荆襄將漕觀施設小攄曾次浩不極一闢土疆包有
截江南梅開欲飛雪老境何堪與君別可竚促召黃金
闕為賀收功在三傑

送徐正時歸浦城

徐子志義士觸熱如探湯遠從南浦來訪我存與亡語
兼瓊瑤溫氣回蘭蕙芳炎雲正爍石懷抱為清涼顧予

巖壑姿小築台山傍兒輩雜編氓荆扉繞松篁感公久
留茲語離熱中腸行行括蒼道念此山路長公懷武夷
春復多知見香青雲勉震耀宜近天漢光草堂不道遠
時寄烟蒼茫

別鄭康道

與公相從久未始蹈瑣細我既困索米公已安吳地一
鄺了百指與閑殆天意陛下聖而武庶物進以彙擇
材訪耆宿絜若數一二考槃出幽隱鼓篋趨朝市公尚

有遐心詎宜忽初志腰鎌與手斧甘窮幾經歲我願以
公名充庭如孔翠風雲際盛旦用激志士氣胡為倏來
往老懷惜摻袂惟冀加食飯賢者不終棄功名會有日
當看詠既醉

別無錫南禪蓮老

僕昔困衆難老來始一欣得履方外趣不涉券內聞留
錫憇福境禪悅志所勤日歛鄉關舊俱歎鴻鵠分偶同
一牕雨永懷九仙雲好持洞下香法界期普薰

和程機宜見貽

僕昔困犯難戎陸日所虞何能守一經且話雄千夫識
公好兄弟宛同周司徒爽徹絕俗姿秀發連璧軀駸駸
駕文圃吐論清而腴伊流如學源一洗衆病膚韶音泐
沂說舉世必所無公家徐起之力因拯其蕪諸儒步武
役反若轅下駒方知鉅鹿功列國宜鳬趨念茲風塵際
再得如元珠流光澈太清欲飛月下烏釀為五字句妙
語兼良圖愧此溢美多通甚非康衢新涼到槩几翠竹

環茅廬更當對論文莫問金僕姑

和鄭康道喜雪

東方已明雲海立怪來雀噪爭枝集凜氣著人不苦寒
老境增衣欲重襲忽驚朔吹翔臘白隴畝為祥時適及
稍聞清響食蠶聲漸看落簷傾粟粒繁梅閣竹巧相積
透隙穿窻莫能戢散鹽蔽空誠非虛回風作舞勢方急
歷亂瓦溝已一撇紛泊何假鮫人泣但喜彌空絮影下
不管霑衣玉塵濕谷口先生好出詞韻險致高俱足給

嘉言浩若長河注答問殊非古井汲乘時和樂致上瑞
屢豐固非一朝緝湏知天門開九重布化調元密呼吸
明朝稱賀明光宮高冠長劔千官入

和李判院見貽

楚風燃竹爆幽吼曉覺春雲時蒼狗慚看歷日與桃符
猶襲塵緣戀升斗先生冒雪肯過我椒觴得奉談天口
寒素每歎濡之儒品俎常嗟韭之九但喜盍簪侍誨約
涉世粗豪一肯首五雲會約采真游天公見賜良不苟

和王倅見惠十篇

惟公霄漢資稍稍摩天翮回溪畧蹭蹬乃爾詠葵麥會
復見軒昂一笑忘羈客

有琴寫流水無言道情素水寒江海深川濶牛羊暮倒
指三十年猶記潮陽路

道遠一跬步心勤每僞如荷深露初下翠密紅亦疎是
知詩興多賸寄懷人書

老態念百出僮客無吳田空收靜中觀三疊能踰蹠以

之忘物我此生休問天

十篇賁蓬茅心親不道遠
內拊如登瀛外愧稽策蹇
徒誦碧雲句幽香發芳苑

若人富文史皮裏羅陽秋
婉此建安格當從古人求
醉侯豈可縻當封富民侯

伊昔晉室雄風流藹於門
至今掇巍科儒行歸後昆
子舍江左來應喜今尚存

僕頃將明命三往責楛矢
所期宣國威寧復賦霞綺
須

知處死時與生亦相似

嗟嗟困犯難皎皎心莫改而能畏四知遂復瞻八綵又
起山林思浩蕩渺江海

潦倒固久矣猶涉世網深中經謗嫉人屢欲魑魅尋赫
然天日照敢改藜藿心

和程右史見貽

平生仰東坡蘇程契尤熟兩家慶流深雲外世高躅於
今鳳池貴方判卞氏玉何止試典刑一想岷峩綠

和程進道見貽

秋聲起木杪便覺密葉稀風至草木勁水濶鴻雁知壯
懷感揺落歎息囊中錐功名未卓立此心常坐馳君家
朱橋側細俯秋水遲氣近龍鳳闕喧無笳鼓悲蕭齋琴
書靜不知花影移棣華好伯仲騰起風雲時心親詩禮
學日與富貴期不忘黃塵苦乃眷寒士饑此理誠素抱
豈復持詭隨已獻仲舒策孰謂李廣奇文中有至樂妙
處含天機一官勿言困且喜願不違我誠老賓客合爪

喜見之關西相有在行矣當無疑

和李提舉山宮梅

客中乍喜暄風回徐行東郭嘉惟梅蕭蕭千竿繚秀色
粲粲萬玉明芳蕤海山飛仙墮萼綠珠璫縞袂令人疑
須臾四山下倒景華姿照眼無纖疵主人才氣世所知
意謂澹坐徒爾為杯槃錯落光陸離與客揖此玉一圍
鏘然韻語壓鄒枚清思徹骨歌無歸它時尚容嗣此堂
冠巾亂插無迎隨

和仲遠新池

公有靜中趣鑿山俯清深秋風夜雨過飽聞泉石音雲
岫冷蒼翠游萍紛浮沉心賞殊未已悠然付微吟

和錢處和扇車

君家世德胄富貴出謙受冷然禦冠車為君駐戶牖初
訝鼓清薰與客破宿酒又疑建溪風碾聲出兩肘細視
碧玉架蓮梗轉雙手遂令青田鶴奮翼揮莫後因知心
匠妙殆與造物友人生土宇內孰不涉煩垢有物能渾

成既耦不以九坐使塵沙劫熱惱如拉朽惟君韻高秀
人譽不容口述作協穆如亦莫祕關紐願君均此施清
涼被馳走他時贊南風為佐虞舜壽

和李次仲韻

先生柱史後道價連城重火龍燎金鼎玉樓詎可凍扁
舟造交舊已奏少微動藹然義風暢舉世士莫共雪聲
灑蓬背皓彩耿幽夢相見忻把酒清嘯塵落棟願奉圻
橋履豈憚吏部甕六鑿方有愧一錐煩屢痛益知仁者

心新詩得頻諷

和丹客林公

自念老境今枯楊徒順兒輩求藥方頗聞大藥性炎燥
如燎于原其中藏是非海裏石鼎煎大藥何適求雲仙
但傳鍾呂有妙旨著在詩曲成華編誦之如射必中的
堅然不朽貫金石內外悉云妙在丹吐納何嘗及津液
此事知有行則差種芽安得豆有芽北轅適楚每自失
復似入海欲算沙豈惟阮籍途窮哭錄錄尚念太倉粟

水雲難訪我輩人風期詎知晉江客三百字與五千言
一指便到元牝門它年肯約移玉趾焚香促膝為細論
浩氣收還質無槁有待斯言能却老小築雲卧天台山
再挂此冠供汎掃

小三郎試院高捷喜成四韻

吾妹千里駒一噴綠沙外韜鈴本書史方畧扶經緯小
出附衆策坐使勅敵潰持弧襍穢子雨汗亦良媿

憶天台

懸車歸台山乘田方自勤豈謂羈紲舊嚴名煩聖君
至止忽三歲遇事無一欣屢奏歸田書遐心行白雲

送趙添戎還漳州

北風號枯葉漠漠天正寒弛擔逆旅中方稅游子鞍吾
甥遽相訪別久心萬端意定話親舊或悲或可歡乃將
十年心只作累刻彈脩涂困塵土客庖無盤飧舉杯少
延欸荷子襟抱寬明朝復摻袂老懷悽以酸漳山無瘴
烟漳水無驚湍侍親友于樂勿倦為戎官願因南風期

時時寄平安

春晴野步

春風搖天宇散策喜徐步樂與二三子綠草池塘路鳩
鳴桑柘春川濶牛羊暮眷言益妍煖更約窮逸趣

聞北軍犯淮

落日慘客意老懷增百憂朔風動地吼湖水吞天流甲
馬隘兩淮殺氣橫九州無德彼將滅復讎我有休羽檄
交馳際哀歌寄清愁


大駕親征

北庭敗盟誓飲馬淮之沱烟塵犯江漢烽火連岷峩王
師因雷動虎臣亦星羅靈旗建玉帳鐵馬馳琱戈三軍
指故國巨艦凌滄波一戎遂大定上天佑無頗整刷舊
俗苦掃除涼法苛奸謀尚濟詭既戰猶連和復圖稱職
爾眇哉浯溪磨已悉將相力敢獻大風歌

將至嚴州丘平仲忽舟中見過

念子別我久我心嘗冲冲豈意蘭溪船忽作瀟湘逢一

笑出意表相對如夢中子有親庭樂我無塵事
籠願言雲水信時寄菰蒲風



松隱集卷八

欽定四庫全書

集部

松隱集卷

九至
十四

詳校官庶吉士臣翁樹培

侍讀臣孫球覆勘

覆校官中書臣田尹衡

校對官助教臣汪錫魁

謄錄監生臣程元鼎

欽定四庫全書

松隱集卷九

宋 曹勛 撰

古詩

次魯季欽安序堂韻

蒙溪有廣廈先生居之安雅得林泉樂不與塵土干
隱隱揖遙碧瀾瀾濯清川高明意乃適至游情所耽
世故蠟味薄豈待寶所參北牕接陶令素月撫阮
咸終吉遂無咎位置遵連山邈哉巖壑老公契如金

蘭揆此宅相奇歡然談笑間落落幽勝處安得同游
磐媿我西北客恨匪戶籍占但當風月夕遐想冰雪
顏

次李提舉過南園飲散賦詩韻

小山叢薄棲南郭蘭若蔽虧如間錯竹色低侵几案
涼海雲常壓波濤惡遣愁五字了未有取醉一樽良可托
折簡敢致先生游俎豆陶匏殊寂寞風流固自出元化
祥鳳本合巢阿閣步武乃肯臨草草塵光不間知落落

今年田疇極豐熟早禾晚禾靡風電為酒具黍共婆娑
應為野人一笑作

次蔡瞻明題南園

小亭倚山肋東望渺雲海松蘿翳窻戶披拂大塊噫細
路窘步武幽花植湫隘隣有長者轍乃幸接符采山為
獻秀潤水亦舞澎湃語真頓忘歸談宗知有在復拜五
字句新喜入四大尚期一笑粲天宇約晴快

次韻程機宜感懷

海風吹秋志
士增感八韻

幾見秋風來坐念歲月改宮蕉泣白雨孤愁越青海
十年戈甲際四海烟塵中慘慘鼓角晚萋萋禾黍風
至交類萍梗離合寧前知相思梅花發豈待中郎吹
老驥千里志元龍百尺樓想同湖海心逸氣橫清秋
阿俊平生友忘言金石志永懷菡萏晚應想峨嵋翠
北塞草色黃吹作邊風駛惟公發蹤謀莫並橫經士
浩蕩氣明潔慷慨念廢興何能一念息空令衆愁增
敵疆未尋盟天王日嘗膽邊聲入河嶽孤臣增百感

次南安務前水亭趙介叔韻

茲亭楚風烟晴嵐獻斜疊我來及秋杪黃花舞紅葉主人喜清論曠覽意並愜明年西郊春會當來日涉

松憲用杜句為韻和以棋酒為意

相君有妙趣一切不容且紋楸誰與談惟彼上人者燕坐靡天游何必求雲將冷然契至道廐有真垂黃游戲三昧手絕代無對棋勝負俱可喜是中聊作癡簾旌風不搖博山雲自度主人下東山月色轉歸路

小小試部勒誠可銷長日汀沙點鷗鷺局帶山雲濕
相君有妙理芳醪正所應紅粧艷綺席翠幕張華燈
公富天人學已收廊廟用宿有雲水債聊寄泉石供
擣香復篩辣兵厨瀉芳酒天宇澄清瀾山中寄聲否
紅塵舊老我青秧新插為寧幸田畯喜何能屬車鷗
誦公十妙語便覺舒華年意與境俱會超凌心以仙

登逍遙閣

廬山

松杉閼琳宮仙君朝帝所神風故靜默人間漫今古地

靈驅鳥雀磬聲肅壇宇倚檻夕陽間雲山認歸路

謝李伯時自臨安見過台州

我生雅志泉石間金閨通籍誠厚顏真人下憫羈勒舊
琳館許辭鵷鷺班

念公萬里回異俗睠我南來忘趼足它時短幅問死生
為向荒寒訪雲屋

與曹道士

吾宗有佳士導江秀賢支妙處本清淨浩氣蟠虹蜺駕

言還廬山春臺方融怡他時鳴雲璈共採桐柏芝

擬古

君有西州役金爐斷夕香虛窻伴幽獨惟有明月光
帳深清露寒繡冷雙鴛鴦明發持似君知妾心淒涼

戲作

昨日暴熱加蘊隆今日寒色如窮冬居然寒暑變春事
大鈞造化誰始終我欲直前扣天闕萬神森衛不可謁
上玄豈縱勾芒神朝驅赫日夜沉月吹香濕玉失長養

發陳璽啟若徒設願天勿令移指麾却收正令還春曦
暄風布暖活貧窶免詠眉山禦臘衣

効寒山體

嗟我世間人有山只暫聚富貴空中花遇合風裏絮夜
夜植業種朝朝奔苦趣佛有妙蓮花讀取平等句

嗟我世間人強有六親念看子是惡少目妬作美艷分
香且供佛有財莫言儉俯仰即異世六尺那可占

新秋自喜信筆

嫋嫋秋色來不慳翩翩落葉鋪闌干藏鶯社燕園中靜
蘆葉藕花波水寒我生逢辰似陸賈老去恨未歸長安
天公賜以八旬老客況如寄僧家園

中秋前一日邀賀子忱為對月之歎乃審放意
山林扁舟東去引企不已偶得小詩

積陰掃秋風吹作今夕月山嶽四高寒天地一澄澈幽
人渺何許應喜清暉發一樽不同樂孤光共愁絕

人倫僧求字

上人早出岷峩山頗游五嶺崎嶇還妙定休咎指諸掌
會心不出眉宇間顧予從來多得喪歸老林泉喜無量
它年見我巖壑中應笑如如得非相

過江州柴桑淵明故居

匡廬游遍僧家園南望柴桑墟里烟但尋曠畦供指畫
不知市井今幾遷五柳既無只衰草三徑莫識皆平田
欲歸四顧但遐想歸來高致猶凜然

感齒髮之衰作詩自解

我生飽艱苦初年心已衰況今七十化形憊聊支持頭
童漸不束齒敗餘牆園髮落尚爾爾齒豁良依依

過淮值雨偶成呈王樞密

明日立秋秋色至向晚雨隨大風起飄盆如麻不足喻
倒海傾江差可擬高林老木亞復折簾幕頽垣紛若委
須臾霽色上南山落日燒雲照淮水

王樞密見和復用前韻

惟公帶礪長淮比聊為蒼生拂衣起一時冠劔滿漢殿

簡注非公欲誰擬金鑾文采粲黼藻玉宸平章看端委
敢將蠅影附驥涂願薦盤盂奉明水

老病

老態日益出老病日見侵疾多戒少飲杯行常淺斟孤
坐每憚起紓思不成吟白日事有待中夜誰知音

懷歸自訟

讀書老不入屢讀屢遺忘遇事欲強記轉首輒悵悵以
此趨事為豈但成嘲謗人豈不自知去矣殆天放

治圃

腰斧治小圃樸檉久不省妬芽盡芟除條達出秀整臨
津獲梅株梧玉作寒炯三遠無所裁留看橫斜影

虛飄飄

虛飄飄虛飄飄禹門三級浪仙子百花橋雪霏輕作霰
簷溜凍成條游絲千尺網春色掣電一抹收遠霄虛飄
飄虛飄飄比時幻聚猶堅牢

梅

吾家舍西多此梅白玉花綴棠棣枝冒寒糝糝已蘊玉
自開及謝酒屢持羈棲臨安三換歲向來一醉知無期
君家此花富冰艷舉觴折贈如雲披欣然拱眎不暇揖
坐想故隱增依依只今匏繫未歸去俗鞅吏網相驅馳
就公看花仍摘實信美我語如觀頤祇應兩菴有歸夢
夢到花下奚復疑

寄張達道

茅峰何山亦何好瑤木琪華並三島其間巖洞邃且深

隱居仙人得窮討遠業已跨雪色驢諸孫何能玉顏老
黑虎會有青鸞信洞章同夢池塘草關鍵真符付自爾
鴛鴦瓊壺每傾倒頗聞雲篆經九試自應太上傳三寶
他年芒屨謁凝神洗心拱聽無上道

送鄭猷歸福唐

君家有唐第一人耕隱谷口同子真臨安始終三十載
我亦掛冠君歸闔重話向來倦游處蒼顏禿鬚皆如銀
喜君南歸不可從雁飛時寄天台春

王正道再遇竹冠輒和來韻見鄙悰

惟公秉操如仙官一任酷暑兼祁寒存心香火接造物
達誠果再逢竹冠應言蓬萊有至樂六十九洞無纖惡
松姿鶴態不復老琪藥瑤房未嘗落上庵至真聞屢過
口付訣目相琢磨公今得妙騰逸駕我嗟老景飛輕梭
願投黃寧拯將溺有香一瓣致禮敬誦生神歌

先生有號復有官不畏隆暑兼祁寒歸來山中侶松檜
無愧太上翔雲冠我比同庵有餘樂雲山百好無一惡

喜君宏度如容波
媿我大匏真濩落
乃今漂流如無何
進退未果徒鐫磨
夢魂游揚欲舞蝶
歸意浩蕩遄飛梭
得歸冲晉雖當侵
伐後一醉尚可同
詠歸山歌

與馬通判

皖山邃密常若春
中有仙士久隱淪
幅巾嘯傲喜接物
彷彿白鶴乘孤雲
竭來帝所暫戾止
疊疊清言償所喜
內慙已老不受教
猶幸一奉圯橋履

題衛太尉巖集圖

衛公雅志安林泉，稟生似無塵土緣。
英標孤映出羣鶴，姿儀密際三界仙。
居臨山麓絕煥麗，楚楚松竹相後先。
幽巖嵌空截綠玉，嘉木蔭映搖蒼烟。
喜招社友共清集，中有一老談幽禪。
其餘六逸咸自若，炷香瀹茗殊怡然。
曹丘倚案獨閣筆，想見窘思人所憐。
衆賓得接書史樂，浩氣高壓江湖天。
只覺談話可上漢，不擬步武猶居鄘。
墨隱能畫巧為此一段美事，端宜傳好辭。
更賦風月上勝韻，直徹星辰邊。
他時一笑，以下闕。

松隱集卷九

欽定四庫全書

松隱集卷十

宋 曹勛 撰

律詩 五言

投連泉州顯學五十韻

某也多奇蹇艱難已十年素風惟汗簡生計只韋編先
業雖殊軌時流幸比肩固窮心尚壯鼓勇氣無前念昔
時方阨居懷影自憐廟堂并董毒宮闕識玆涎敵騎南
趨楚天皇北狩燕六龍塵黯淡二聖淚潺湲

某以幹當
龍德宮扈

從太上皇帝
北狩至燕云故國人何在新君信未傳自陳心膽大肯

避虎狼先落日幽都路西風易水壖珥璫金不暗睿札

墨仍鮮

某到燕京被密旨晝伏夜動齋持上皇御衣御札邢后金環子投進

間道逃穹帳

開緘徹御筵第知從聖化寧復較騰騫寵錫蒙天造兵

戎付路權危言乖上相邏職俾南泉

蒙恩錫帶增秩差福建路分以奏敵

營密事黃相謂警朝廷止授州都監

復記丹陽渡初移御座船孤城逃守

令衄陣擁戈鋌法駕方登頓生民宜保全嬰城因率爾

拔劍意茫然軍旅增提振困儲不棄捐詔封霑錄用師

氣亦周旋

北權鎮江府兵官經車駕渡江南幸府中率皆逃避獨死守訓兵即日蒙獎諭遷秩

部領終如舊奔馳信有緣萱庭方舞綵紉序忽終天

遽見炎涼變悲隨節物遷故園愁緒外歸橐淚痕邊

朋舊仍稀濶饑寒念接連豈惟裘已敝政坐履長穿

塵土千山道風濤萬仞淵輿臺俱偃蹇鞍馬亦迍邐

茲幸提封肅方依刺史賢宣恩持閫寄持橐下班聯

日煖黃龍北風遲紫帽巔

黃龍紫帽山名

五兵咸內戢千雉

即中堅廡屋除餘壤榕陰上故烟既能防勇鬪誰敢

闕緡錢黠吏俱冥迹虛詞詎得專禦流先治棧發偽
不輕蠲燕寢鈴無響虛庭草有芊盡欣新政下一洗
宿疴痊皂蓋聊均佚神舟艤濟川藩維隨振舉風日
遂清妍只恐三台近行看一札宣第功宜玉帶歸照
稱金蓮徑入雲臺仗宜陳述職篇衆人心戀戀閩部
思綿綿內顧茲緣病趨承失備員但能懷惠養愧不
預橐鞬恐後瞻依便先伸梗槩虔秉鈞今有待拱手
聽陶甄

張右相生日二首

玉律歌無射金風下四蓂三台丞相位一德將臣星弼
亮時師表文章世典刑百神扶大手遠業慶千齡

氣稟無為秀鍾靈付秉鈞周南知盛德江左任斯民袞
繡東山望貂蟬綵服春帝師殊壽祉漢祚有元臣

曾端伯自承移帥川口有懷風旨無便附信忽
領教喜成小詩附便奉呈三首

好在曾夫子寧追晤語期倚毗離楚日鼓吹入夔時赤

甲薰風近黃堂淑景遲相望邈坤軸空詠竹枝詞

衣袵先九潤此日上瞿塘風月動官柳旌旗開蜀疆詩
壇凌李杜政績過龔黃追詔知非晚肯令生智囊

某也庵居久心形付自然山林藏老退松竹養風烟遇
物元非遠尋真自一天懷人會心處熟誦見山篇

和賀子忱喜雪

蘊玉梅初艷埋青麥自豐漸水留水研時喜拂窻風能
賦懷王祭開樽憶孔融警寒方認鶴掃逕屢嗔童色動

書帷白寒侵蠟炬紅剡溪方逸想秀句墮春工豈意疎
慵外猶存引領中須君乘暖景一笑得相同

和泉伯幽思韻

蕭蕭雲日靜細細竹風侵窻影方虛白爐烟一沒沉帝
鄉憐久客歸夢亦何心洞戶褰珠網應煩問藁砧

每惜年華易風燈與鑿光心情成老大世態只炎涼冷
入芭蕉雨烟輕薜荔牆故人愁更遠夜夜渡清湘

和子忱惠八月青梅

神仙聞水部妙物與長生鼎飪元滋味山樊好弟兄佳
音當有象短韻已馳兵試咽甘酸處行看雪裏英

和錢處和野堂

日淨嵐光上山藏野意添海潮來隱几越岫巧當簾絕
俗宜招隱論詩未屬厭居雖朝市近事事見安恬

堂隱雲將隔名高客已知半巖施匠石一室見操為鐘
鼎功方著山林興未遲蘭臺風致在更喜讀新詩

和人久雨

綠漲東籬菊桐凋古井欄雨頻傷早穀烟冷佐新寒有
木皆生耳何顏得渥丹平章濟農事清坐且團團

眩瞶知陰久茶甌不厭濃第憂沉稼穡寧問浸芙蓉天
濶翻盆雨雲昏淡墨峯長安鼎烹者列坐正撞鐘

連朝陰未斷仰食慮尤深簷溜無窮響邨燈幾處砧吾
兒詩有債老我韻勞心屏翳安能借吹天掃積陰

和曾守有作

問俗猶秋熱移牀趁晚涼笑談懷酒伴節物念吾鄉聞

道銀槽熟思傾玉指香政須圖一醉寧復較行觴

和人見貽

某也多奇蹇當年侍玉除馳驅先輅馬扈從達幽都守
已常安分臨官歎自愚旨甘方薄宦一語冀逢途

和王應夫見貽

不見應夫久永懷清晤同名高湖海內詩在笑談中光
泛崇蘭露香傳碧桂風只應家學著更看廟堂功

況味年來薄書音寄亦稀亂離多病後人物故園非潮

揭當年會朋儕幾旋歸悲心那聽此生理念依微

和雙溪

常憶雙溪老伽陀日益多津梁今坐斷風月奈君何清
梵山藏路南薰歸滿柯何時話睽濶芒屨入雲蘿

和曾畝父見寄

活水從澆竹閑書會引眠玉溪何處所璧月共清圓詩
到惟供錄歡如不隔年何當見風度應向日華邊

小菴雲雨上朝檻俯晴雷客子得幽勝道人時往來閑

情聊自喜昔事只堪哀冲嗇從茲老何能敘玉臺

和茅山張達道

茅岫藏清隱詩仙秀格春道真淵有妙素守峻能循鶴
舉秋聲遠詩成句法新遙知游詠樂言筆更如神

好笑曹功顯山林過幾春世緣猶積壓塵網復因循踵
息綿如在顛毛雪更新歲華行八十泉石正馳神

和國器喜以事業為懷

鄭氏傳家學詩書不愧心佩刀知素業游序况同襟但

喜知難字何能識至音小軒多暇日為賦九州箴
久無軒冕意出處亦何心世味思三沐花風快一襟喜
君方礪志顧我豈知音鑒手非吾事深慚不可箴

次韻呈南嘉

塞外初歸節泉南濫總戎請纓懷壯節橫槩媿家風草
木年華晚關河鼓角雄何當一笑粲要賦馬羣空

用李叅政游延福寺韻上之

落日泉南郡秋風嶺北城台符均庶等杖履喜幽行與

客情文重持懷事物輕致君皆典禮躋俗向不平相業
甌名在辭華鉢韻成豈惟才廣大且復性澄泓賤子欣
承庇微官得代耕孤單常自畏比數欲誰名橐有書千
卷家無屋一楹朝廷今再造心跡漸雙清山轉客容薄
天迷海色橫心期奉圯履鎔冶在高情

和同官問耳疾

行年七十化賸景亦乘時日近尤為祟雷轟尚弗知顧
多居士病賴有寧馨兒若得都無聽唯哦見贈詩

鐘鼓嗟無與衰殘亦任時歲華髭鬢上心事水雲知尚
若冷然善何能養就兒數篇存雅道三復愧新詩

牛關當年事何當復此時警乎雖有象默爾類無知不
作多聞士難尤造物兒儻能三耳出更誦五言詩

愠心雖悄悄藥物亦時時半耳念非病全身贖始知三
湘懷楚些一櫂憶吳兒會見相陪處應多古錦詩

袁宏方詠史江總得隨時歸興連天去文盟落筆知雨
多移蟻垤花過靜蜂兒賴有西齋友薰風正入詩

中原因戎馬久欲謁明時
文軌雖非昔英雄似未知
寰中無好漢帳下得豬兒
慨念燕然勒終還吉甫詩

久雨

五月正陽月何嘗與雨期
浹簷溜注深夕水聲馳古
屋床床漏苔墻堵堵隳子
桑誰復餉勾漏政須醫
蝕餘仍苦雨猶爾晦陽暉
浩浩陂三尺家家水半扉
汨陳非佛意昏墊蓋天機
祈懇須冥造當仁要達微

一旬連夜雨人物困泥中
竹樹侵書暗橫流趁路通
竈

烟薪更濕簷溜耳難聰潤逼衣襟重何時日照東

松隱集卷十

欽定四庫全書

松隱集卷十一

宋 曹勛 撰

律詩 五言

贈胡珵隱君

星聚西豪里人誰識少微忘懷券外少此道眼中稀
筆墨騰瀛禁圖書動袞衣趨風忻並世一語欲清非

贈張鍊師

昔仰蘇仙跡今瞻弄玉身岳靈朝捧劒颺騎夜朝真
笙

鶴聲常近烟霞到處新願言承道蔭秘語慰斯民

又

護幄通明殿仙階貴可知塵凡聊渾跡功行欲康時
明月丹崖路秋風白玉墀行聞普濟足飛步萬真期

題小石接待庵

老大思閒遠山林喜晦藏一廬雖異縣三徑得崇岡
地僻烟雲潤年豐黍稷香心期得多矣襟袖更新涼

題今是齋

偉矣高情著齋名世亦稀但能塵事遠便覺昔年非琴
靜凝香碧神清衆妙歸諸緣只心法鷗鳥亦忘機

敬題箕穎集後

昔侍先君日多令誦近詩尚知塗抹處猶記唱酬時竟
負經邦志終為造物疑篇篇親訓釋字字念恩慈

太史推經學

東坡謂先公深
於明經史學

先君得最深文章八面敵

辛苦一生心禁掖傳新句公卿錄苦吟遺留示有子捧
卷淚盈襟

寄漂水宰李仲鎮

不見李君久水雲魚雁沉調官聊製錦得句賸關心每
訪民情悅相望春事深故鄉與賢者北首重登臨

小三妹遠持兄嫂之命見訪于荒寒寂寞中將
歸二詩為別

投老台山麓松篁築靚幽行年今七十撫事幾春秋但
喜親情話難忘為小留山川煩跋履事事見操修

不見小阮久相看情甚溫肯來成宅相端可大吾門暖

日長江路梅花細雨村真成好兄弟言謝却忘言

示諸子

霜入晴雲煖水生掠岸沙卑枝閑剪橘幽徑試尋花客
路人情薄鄉關去路賒只應託諸子莫倦問桑麻

獨步南園寄子忱

野老悲春事相如復倦游肯來傾濁酒同與散清愁遠
岸重重柳晴江處處舟飛紅殘照晚閑倚水邊樓

聞敵兵近淮

壬午收亨運餘屯未肯休風烟淮水近天地老身愁敵
意驕如昨江干景易秋得閑如自若心在一扁舟

方撿詳出歙研求詩

黥歙與端璞爭雄稱權奇馬肝乃正色龍尾終視儀霜
毫淪紫玉松烟生華滋都付文學老看誦浯溪時

淮上幕府

上將宣威重長淮朔吹來兵戎已超距鼓角有餘哀日
薄雲多暝天寒火易灰詩成且排悶興在倒金罍

聞有衣冠附偽命者

義分元無守跳梁遂不臣
美新應有賦思漢定何人
晚景嗟逢此孤忠尚欲伸
君王在靈武日竚靖風塵

問訊子忱游天台

落落賀吏部蕭蕭湖海姿
好山應自適短棹得回遲
花發庭中檻香傳舍外籬
相思梅已謝無處問歸期

喜張叔潛登第

丙午之冬

潛也忠良士騫騰喜縱觀
主人收俊彥學校益尊安
臺

閣名聞久交游意始寬
佐時行拭目正論聳朝端

到廬阜謁清虛

足趼踰千里仙山豈易逢
欲將遮日手欸扣撥雲峯
奎壁垂無極星辰拱幾重
師心微太漠不礙白雲封

游廬山道中作

早踏丹楓路西風禾豆乾
鳴榔秋水濶擊漂曉溪寒
短褐宜扶杖長涂懶據鞍
却思冬後景黃菊壓欄干

游廬山涂中雜詩

天台久宴坐廬阜得遊遨殊慰水雲念敢辭塵土勞冬
溫寒色少江靜水痕高歸趁新年近同斟玉色醪

去去忘回遠行行迫臘天江寒侵老淚霜冷逼宵眠客
路雖經至歸涂尚過千家山在台嶽南望幾悠然

稅駕南昌郡城頭喜少留兒時誦閑賦老境作佳游傑
閣收英槩長江倚暮愁何人識老子清月上貂裘

苕溪道中

秋日苕溪路輕舟棹晚霞夢魂猶畏客行李乍離家細

細來涼吹娟娟有晚花平生雲水興老境似難誇

過小圃

小隱州城北先謀儋石儲幾椽將弊屋數策未看書碧
色新松徑泉聲舊石渠欣然終日過真是愛吾廬

上塘值清明

客路逢寒食划船開水干嬌雲易得雨暴冷不成寒白
水連天去繁桃觸目看朝來有家信稚子報平安

客路逢寒食清明未到家起居須藥餌飲食任魚蝦水

淨垂垂柳風遲艷艷花興來隨處樂不復問年華

客路逢寒食猶尋禦臘衣羣芳須暖景曠日尚寒暉餘
力求閑早勞生昨夢非薺花渾似雪蝴蝶夢中歸

客路逢寒食光陰亦可驚如何介子節再過闔廬城列
岫遙逾碧羣芳晚更明餘風力壯掀舞小舟輕

客路逢寒食山光觸處新取魚多樣網艤岸幾州人默
爾非無住超然得任真今年卦氣盡四顧欲何親

客路逢寒食浙西春事稀日華藏暖景天氣未單衣歌

棹喧椎鼓桃花巧映扉空收薶麥粉藥病豈心違

客路逢寒食禾秧出已齊清溪三汊淺白鷺一行低襖
飲心何在茅峰路恐迷隨時隨有樂何處不幽棲
客路逢寒食欣同不繫舟閑中聊適往要地固抽頭不
作揚州夢何能賈客留壯懷今斷斷世事任悠悠

涂中寒食

上巳當羈旅飄然浙水東好花閑照水宿雨冷連空靈
武兵方振燕然信未通無人訪老子有淚濕春紅

南園夜宿有懷

老病杜門久佳時誰與過親朋懷我少風月向人多梅
影橫清夜江聲動白波不如潮早晚牆外聽漁歌

臨安久雨

初夏連朝雨土人云入梅但聞簷溜密不見曉光開衣
潤疑霑汗堦空任長苔地車無住著只擬上層臺

謝岸老惠顯明新芽

幽壑垂春摘芳芽辱見分鶯花妨老眼香味喜新聞細

石飛輕雪圓甌泛亂雲雖無七盃量清興重欣欣

食齏有作

點化八珍爽須煩一品齏村寒求爰下麪法記山西宮

徵難忘味

齏賦云嚼得
來宮商角徵

膏粱勿遽迷終然調鼎手深旨

出扶犁

得致仕喜成

久甚嗟形役今方得自怡所欣官已了得與靜相期風
月閑如舊心情喜可知山中雞黍友賀幅已先持

憶梅

江雲暗江路曾向玉川家
冷入參差玉香隨的皪花
照溪回夜色冒雪冠春華
猶記西窻伴寒枝片月斜

暑後喜雨

雨因祈禱得連日作廉纖
候變涼飈肅人皆和氣添
秋暘猶執熱竹色故侵簷
但喜穹崇德難從甲乙占

招賈祕書

不見賈夫子病懷何得陳
呻吟一春了物色九秋新
閑

花翳欄檻秀氣浮衣巾笑言約中澣雞黍供蕭晨

和張才甫野望軒

聞闢新軒檻高明豈鞠窮八荒供望眼萬事付冥鴻聊
味青龍鈔公日念佛聲不少止行趨白虎通大千兼内外拈出便

無同

寄吳思道

別去書音短愁來客路長飛魂常故國舉目念殊鄉未
暇論奇字何堪別最良秋風入邊草意苦不相忘

簡冲菴故人

寄跡臨安久思歸夕夢頻愁多難強醉病苦故禁人夜
短無清夢年高歎幻身山中有道伴雲壑擅餘春

松隱集卷十一

欽定四庫全書

松隱集卷十二

宋 曹勛 撰

律詩 七言

恭進德壽芝草

椒掖沖襟奉玉宸
靈芝莖葉出氤氲
如頒月令欣欣政
先學巫山藹藹雲
璀璨吐奇康壽棟
輪囷絕異漢唐聞
只應一葉三千歲
萬億斯年贊大君

會慶聖節

帝出乘時叶小春中興復古付曾孫奉親聖德躬仁孝
御極天章廓宴溫書軌自應歸正統戎蠻先已侍脩門
凌虛志遠吞寰宇億載端臨四海尊

癸巳聖節

堪輿亨會接洪基鬱鬱葱葱動紫微理契奕秋專國手
德兼周武一戎衣恩言下浹皆中道帝意終潛復九圍
升濟羣生歸大業同心億萬仰天威

曉雲紺瓦不飛霜瑞靄融春十月陽電繞璇樞開上瑞

虹流華渚叶珍祥威騰紫塞天驕外日拱蒼龍闕角傍
今歲泰壇伸謁款是宜萬壽詠無疆

恭奉聖訓賦凌虛

新規傑閣倚蒼巒地拱天成十二欄但覺星辰來廣莫
不知步武切高寒春風先到黃金闕皓月常臨白玉槃
曾侍威顏香案末遂瞻旒宸瑞雲端

宣召看紅木犀賜宴索詩并謝恩

九霞深借曉光披粟粟輕紅蔭碧枝不逐秋香勻菊艷

要烘花色並彤墀涼雲收雨盼慈惠寶幄中天拜宴私
折得一枝恩所賜喜如初挂綠衣時

恭覩上聖親臨江淮耀武伊洛謹成詩一章仰

贊聖化

辛巳

曉傳清警出龍樓八駿騰驤下斗牛鐵騎屯雲朝障殿
羽林扈蹕拱凝旒暫迂玉趾臨三楚便覺榮光煥九州
恢復故疆知默定已看森索墜旄頭

恭題觀堂

松篁深靚隱新宮十六清真位位同笙鶴似臨三境上
珮環應下五雲中烟霞頓隔塵寰路道德追還太古風
固已羣仙資聖壽嵩呼益願祝堯聰

初到闕下

墨勅雙馳侍帝傍何堪窘步入明光退風久作翻風翼
倦客何能久客梁野寺殘僧思緩步斷橋流水憶寒香
何時短褐携筇去數里松聲細麥岡

故舊見辟幕府

生逢艱苦念無前
扈聖猶悲易水壩
知効一官常自愧
死須五鼎遂身先
頗收姓字朝廷上
寧復功名日月邊
軍旅固非平日常
願將餘力從橐韉

持節和王樞密

長淮矯首得遐觀
猶記當年獲奉轡
萬馬飲淮貔虎肅
六師扈蹕水雲寒
欣瞻幕府蓮依水
慨念神州李下冠
狼望已銷歸廟畧
更持韻語訪任安

稍陪酬唱與榮觀
聲並琳琅和八鑾
可但文華迎日麗

自然符采照人寒笑談殊喜親犀塵接待終慚戴鶡冠
公等雍容瑚璉器騫騰行見近長安

右府登車竦聽觀皎如玉韻叶和鑾清薰已解南風愜
和氣先舒易水寒行李喜陪金虎節移文應闕竹皮冠
願看歸去為霖雨天下蒼生在謝安

持節過界

泗濱悵望草連雲眼暗淒塵祗斷魂香火固難尋寶塔
雲烟時復見沙磴五更悲壯眠難熟一片荒寒曉更昏

往事興懷今二紀道傍父老豈兒孫

持節過京

與客西游歷汴都荒寒不復見吾廬只今黯黯塵埃起
當日葱葱氣象無雖覺人情猶向化不知天意竟何如
遙思閭闔西邊路一夕飛魂繞故居

昔家州西
竹竿巷

聞江上捷音

朔騎南窺久未恭天王清蹕靖邊烽軍威早已聞三捷
喜色遙知動六龍師旅夙嚴新號令版圖行復舊提封

中興大業書歌詠願刻浯溪頌九重

被旨軍前講和得回

仗節親宣詔語還敢期幼推得重看鐵衣冷挂龍鱗靜
寶劔高藏玉兔寒兵甲從今挽河水兒孫獲與復儒冠
清閑放意山林下老援何能更據鞍

呈時宰

時年十八

黔黎誰識迂衡功赤白囊開寢燧烽史不絕書稱上瑞
地無遺利足三農已聞奠玉祠真室未見泥金欸岱宗

七十二君梁父禪何時展采更東封

又

不毛山海盡梯航德洽重熙聖祚昌萬國鼎新周禮樂
千官星拱舜衣裳惠露圜土恩波濶德及昆蟲化日長
天地至和昭感格比聞甘露降番陽

政府生日

文經武緯致尊榮功德崇高不可名草檄預聞全國勢
按圖行見復都城袞衣三總郊丘禮黛耜初親帝藉耕

過眼蓬萊幾清淺凝神治道自長生

上公翊戴肅朝紳袞繡趨庭下帝宸一德格天瞻相業
密雲不雨協郊禋初筵寵錫清都奏和氣融隨明日春
成算自應同壽算兩河黎庶待陶鈞

鉅德元功鳳應韶屏風隔坐翊昌朝星辰循軌三階正
鐘鼓重新一氣調活國工夫歸斷斷鍊形真一已飄飄
芒屨門下塵埃客拔宅惟看上紫霄

歲躔回次拱台星麟閣儀刑首萬英鍾阜堂堂分秀潤

淮波袞袞湛清明鋪張治具調元化整頓皇綱撫有生
鶴馭它時赤松伴丹砂九轉待功成

殿師生日

薰風拂拂下槐庭師帥膺時奠四溟代址家聲今嗣業
淮南草木亦知名陣前鐵馬三軍勇肘後金丹九轉成
立國宗臣宜壽考陰功篆玉定長生

林詔使生日

時以御史
募戰艦

杪冬慶閥綺雲浮挺育文英氣奪秋烏府暫煩安遠俗

龍驤方倚破姦謀三吳遂奠時巡馭四海咸瞻入告猷
何止陰功鍾五福巖廊已識濟川舟

何季崇生日

慶閥當年侍從臣傳家今見石麒麟
瑶觴初過菖蒲節碧海聊觀荔子春
超逸絕塵髯政事暑天湯餅魏簪紳
祝公千百松筠壽常對團團月色新

題吳郡王家雙竹

環碧亭前碧玉枝森森連壁揖多姿
節涵宿雨蒼龍並

梢舞晴雲翠鳳差架雪凌霜俱有志懷仁抱義本同時
戚垣密協如苞瑞盛事應先黼宸知

題錢叅政東巖

龍顧初聞闢縱觀盡收清勝閱高寒四圍列岫飛雲靜
十里平湖碧照寬塵尾有言皆灌頂塵中無路不驚湍
東巖端作東山望行為蒼生起謝安

題王懋功秀才秀野堂

卜築清幽遠市塵一川窈窕靜松筠下臨城郭千門曉

中有軒窗五畝春
游藝本圖佳客
語好賢不覺主人貧
我來登覽秋風晚
喜揖清言月色新

題謝太尉養素堂

東山雅望意雍容
養素璇題振道風
賸貯琴書供嘯詠
更新窻戶不青紅
數峯吳越登臨外
千里江山指顧中
玉碾碧天冷無際
中秋莫放酒杯空

賦郭步帥歸耕堂

漢水無波楚岫青
歸來風月久經營
要親稼穡資三徑

已試韜鈴息五兵
賣劍買牛聊適意
揚鞭敲鐙暫忘情
祇應未穩耘耔樂
褒詔行需父子榮

題迎暉堂

爽塏幽居抵萬金
東西領畧水雲深
江山入坐清無暑
文史銷閒靜有琴
何處菱歌烟艇雨
最宜秋月海潮音
主人占得林泉樂
本有江湖一片心

題人舫齋

君家作屋擬虛舟
想見低窻事事幽
竹榦巧同牆影直

簾波寒並水光浮五湖烟月應無意四海風塵計少留
挂旆天山端有待要憑巨楫濟橫流

題客舍

路邊小舍靜無泥風入松杉綠滿枝溪抱回隄山抱屋
舟藏曲港竹藏籬主人野性留應懶倦客閑情去輒遲
內訟塵埃猶僕僕厚顏如奉北山移

寄題祝祕校航齋

密密簾垂映柂樓濟川聊此艤虛舟羣經列坐供游息

巨浪掀天得罷休
猿鶴依棲知有地
兒童遺墜且無憂
業成一棹黃金闕
穩上鼇頭拜冕旒

賦陳嘉謨東西軒

田田東作觀柴關
濕碧吹青一望間
已許傾心常向日
尚容高卧且懷山
光風春動方崇蕙
沆瀣宵零可駐顏
要是耕耘在毛墨
圖書佳客樂餘閒

西成高鑿一軒通
荷蓋吹涼入坐中
新月不妨回夜色
有秋何止閱年豐
直須落日紅無際
剩看羣山翠掃空

更約他年身退後披襟來此揖涼風

詠雙竹

千巖萬壑碧嶙峋密有雙成瑞此君破籜猗猗聯綠玉
並梢裊裊舞清薰巧穿怪石嵌空地色映虛亭窈窕雲
比節合心皆美事孤高殊喜不同羣

賦友人竹軒

軒外蕭騷靜碧雲有來君子助通津烟幢羽蓋誠銷暑
玉軸牙籤不受塵解籜竹林宜瑣碎溥梢風露獻清新

茶爪雅納開懷客俱喜高材似主人

友人所居竹岡以關名之

曉驅羸馬踏塵埃喜見前關亦快哉
幾啓雙扉迎曉日未妨斜月掩蒼苔
聲搖沙塞可無此翠鎖城堦寒未開
趁得雞鳴也須度棄繻不是俗人來

贈許察院

海內知名第一流詩從偉度破優柔
知公少駐搏風翼念我都如露地牛
解臘天容先布暖得春梅意小遲留

紅穿碧甲聊隨俗不奈心驚雁過樓

贈李巖州

謫仙風骨今何如自我不見三年餘
雙眸如電尚可想兩鬢欲雪今安無
干戈塞路軍麾滿骨肉避地星散居
未知草堂可歸否有使可寄平安書

贈聞人子進

丹地清江若有期卜居仍俯小漣漪
頗憐松竹無多地祗頓琴書已近籬
久雨不妨田要潤暫涼真與病相宜

何當去此炎歊酷日待風高脫葉時

贈靈隱老

一笑相逢語上方水雲踪跡覺清涼未論方丈葛藤話
且喜齋厨蔬笋香閑拄瘦筇隨意立却愁欸段入城忙
宿山更作他時約枕簟茶瓜冷不妨

潮州贈劉大夫

山繞蒙菴十里陰兩翁逸駕每駸駸人隨衡雁野雲薄
夢繞鱣溪秋水深別後詩章清有思向來游處賸關心

何妨一笑雲蘿上小約湖邊特特尋

贈李次仲致政

穀水柯山隔幾年又來輦轂拜雲天東西南北任造化
甲乙丙丁皆宿緣老境精神惟坐卧故居松竹想清妍
豈如溪上木中子日飲溪光今地仙

接伴贈相送諸公

曉隨幽徑踏行雲拄頰南山眼界新馬上客塵良自笑
山中梅意欲驚春清愁有底能隨酒世道何方可問津

賴有諸公同一笑得舒軟語話情親

黃侍郎宮祠贈行

無雙佳譽久騰芳
暫解繁機下帝旁
舉世不能容直道
清時聊欲款江鄉
脩涂按轡三秋雨
別殿陪祠一炷香
顧我辱知門下久
語離清淚灑滄浪

與曾侍郎

里巷風和遞曉騶
高軒見顧識英猷
揮犀唾玉聞鄉語
對酒看花話舊游
殊喜故家青玉案
方承大問翠雲裘

願持相業天鈞上箕頴重為第一流

與李先生學士

先生聲徹大明宮
願肯馳驅與俗同
但得琴書娛白日
何須鞭帽犯朝風
未容倦客尋源去
應謂斯人底死窮
它日雲林陪杖屨
欸承願輩囁嚅翁

松隱集卷十二